



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Komunikadu imprensa

Periodu: Novembru 2011

Edisaun: 30 Novembru 2011

**JSMP apoiu inisiativa proponente Bankada PUN atu establese sentru
detensaun ba labarik**

Judicial System Monitoring Programme (JSMP) liu husi unidade Programa Observasaun Parlamentu (POP) fó apoia totál ba proposta ho Nú. 85 konabá establesementu Centru Detensaun ba labarik. Proponente ba proposta ne'e mak Deputada Fernanda Mesquita Borges no Deputadu Domingos Mesquita husi Bankada PUN.

Diretór Interinu JSMP Casimiro dos Santos haktuir katak, hanesan nasaun foun ne'ebé hola parte hanesan membru ba Konvensaun Direitu Labarik nian, politika atu establese Sentru Dentensaun Labarik ne'e nu'udar obrigasaun Estadu Timór Léste atu dignifika no kumpri prinsipiu konabá protesaun ba direitu espesial ba labarik sira. Aleinde ne'e, Estadu Timór Léste nia Konstituisaun mós adopta prinsipiu protesaun ba labarik nu'udar objetivu husi Estadu Timór Léste nian.

Deputada Fernanda Borges hanesan proponente ba proposta ne'e fundamenta nia proposta bá meja Parlamentu Nasionál katak, elaborasaun ba proposta ne'e bázeia ba faktus ne'ebé akontese durante fiskalيزasaun Komisaun A ba prizaun Becora ho Gleno ne'ebé hatudu katak labarik minoridade ho ema adultu sira tama hamutuk prizaun iha fatin ida deit ho prizoneiru adultu sira. Tanbá ne'e tuir deputada ne'e katak, ne'e hatudu Timór Léste la dignifika konvensoins internasionál sira ne'ebé nasaun ne'e ratifika ona espesial liu konvensaun ba direitu labarik.

Deputadu ne'e esklarese katak, loloos estadu iha dever obrigatóriu atu aseguira labarik sira nia direitu bainhira sira komete krime ruma tuir padraun internasionál ne'ebé regula iha konevensaun internasionál katak labarik ho adultu sira presiza separa sira nia prizaun husi ema prizoneirus normál ka adultu sira.

Deputada Fernanda Borges mós informa katak nia sente triste tanbá iha prosesu konsultasaun ne'ebé Komisaun A halo ho Ministériu Justisa ba planu orsamentu jerál estadu, iha parte setór justisa ba tinan 2012, Ministériu Justisa la hatama planu atu hari'í sentru detensaun ba labarik.

Relasiona ho asuntu ne'e, Komisaun A hola inisiativa rasik hodi elabora proposta ida ne'e no hato'ó ba plenária atu hetan apoiu nune'é bele estabelese lalais sentru detensaun ba labarik sira iha 2012. Objetivu atu hari'í sentru detensaun ba labarik sira ne'e hanesan meus ida atu haketak labarik sira husi ema adultu sira iha prizaun no atu rekopera fila fali labarik sira nia morál liu

husi programa edukasaun sívika husi autór judisiáriu sira atu nune'é bele evita sira kontinua halo konflitu ho lei bainhira fila fali ba comunidade iha futuru.

JSMP mós konsidera katak, proposta ne'e importante atu enkoraza Estadu Timór Léste atu kumpri konvensaun internasionál ne'ebé nasaun ne'e ratifika ona atu hari'í sentru detensaun ba labarik sira hanesan mós meus ida atu proteje labarik sira husi hahalok violentu ne'ebé durante ne'e akontese durante sira iha prizaun laran no depois sira fila ba sira nia familia ka comunidade.

JSMP hanoin katak ho estabelementu sentru detensaun ne'e, alende atu evita forma violénsia seluk hasoru interese diak labarik sira nian, iha tempu hanesan sentru detensaun ne'e bele sai hanesan fatin transformasaun edukasional komprehensivu ba labarik sira atu husi mentalidade konflitu ba fali autór transformador sosial iha sira nia comunidade.

Mesmu nune'e, atu asegura mis-interpretaun no abuzu husi oficial sentru detensaun labarik sira nian, JSMP rekomenda atu altera titlu ka naran sentru detensaun, ba fali sentru rehabilitasaun ka sentru rekoperasaun labarik.

Observasaun JSMP nota katak diskusaun ba Proposta ne'e hetan apoiu máximu husi maioria membru deputadu sira hodi aprova proposta ne'e, proposta ne'e passa ho votus afavor 43, Kontra 3 no Absteinsaun 11. Totál Fundus ne'ebé proponentes sira propoin iha proposta ne'e hamutuk US\$ 700.000 ba hari'í sentru detensaun ida ka rua tuir estimasaun proponentes sira. Entertantu Fatin ba atu establese sentru sei konsulta ho Komisária ba Asuntu Labarik.

Atu hetan infórmasaun kle'an favor kontaktu:

Casimiro dos Santos

Diretór Interinu JSMP

Diresaun e-mail: casmiro@jsmp.minihub.org

Landline: 3323883